

# Bahasa Melayu sesuai untuk ASEAN

» *Ilmuwan perlu promosi selaras Malaysia sebagai pengerusi*

Oleh Latifah Arifin  
bhnews@bh.com.my

► Serdang

Golongan ilmuwan dan ahli bahasa perlu mempromosi bahasa Melayu sebagai bahasa ASEAN selaras peranan Malaysia sebagai pengerusi pertubuhan negara serantau itu.

Menteri Komunikasi dan Multimedia, Datuk Seri Mohd Salleh Keruak, berkata Malaysia memikul tanggungjawab besar sebagai Pengerusi ASEAN tahun ini, malah Kuala Lumpur juga bakal menjadi tuan rumah pelancaran Komuniti ASEAN.

“Kesempatan ini wajar diambil untuk mempromosi bahasa Melayu sebagai salah satu ciri utama Komuniti ASEAN kerana sifat kebangsaan ASEAN harus dibentuk melalui ciri penggunaan bahasa yang ‘homogeneous’ atau seragam,” katanya.

## Aspek besar

Katanya, dua aspek besar perlu diberi perhatian ialah pengembangan status pembinaan korpus (himpunan data mentah untuk kajian linguistik seperti himpunan manuskrip dan teks bertulis) dalam usaha membawa bahasa Melayu ke persada Komuniti ASEAN.

Mohd Salleh berkata demikian ketika berucap merasmikan Seminar Antarabangsa Linguistik dan Pembudayaan Bahasa Melayu Kali Kesem-

bilan (SALPBM IX) di Universiti Putra Malaysia (UPM), di sini, semalam.

Yang turut hadir, Timbalan Naib Canselor (Hal Ehwal Pelajar dan Alumni) UPM, Datuk Dr Mohammad Shatar Sabran; Pengerusi SALPBM IX, Dr Hasnah Mohamad dan Ketua Bahagian Penyelidikan Bahasa DBP, Aminah Awang Basar.

Mohd Salleh berkafa, bagi aspek status, usaha perlu dilakukan untuk membuktikan bahasa Melayu sebagai bahasa relevan, dinamik dan mampu bertindak sebagai bahasa ASEAN.


## Lancar lapan buku

“Pada masa sama, korpus bahasa Melayu perlu terus dibina dengan mengambil kira bahasa Melayu yang digunakan di negara ini, Indonesia, Brunei Darussalam, Singapura, Selatan Thailand dan Selatan Filipina,” katanya.

Sempena SALPBM IX yang dianjurkan oleh Fakulti Bahasa Moden dan Komunikasi (FBMK) UPM dan DBP itu, lapan buku terbitan Jabatan Bahasa Melayu UPM turut dilancarkan.

Antaranya ialah kumpulan puisi *Ayn* karya Sasterawan Negara (SN), Datuk Dr Ahmad Kamal Abdullah; *Wacana Bahasa* oleh Prof Madya Dr Normaliza Abd Rahim dan Hassan Ahmad serta *Wira Bahasa Yang Berwibawa* hasil karya Dr Raja Masittah Raja Ariffin.

Persidangan dwitahunan dianjurkan sejak tahun 2005 bertemakan ‘Bahasa Melayu Sebagai Bahasa ASEAN’ itu, membabitkan pembentangan makalah oleh ahli bahasa dan budaya dari negara ini serta serantau, termasuk Indonesia, Brunei, Singapura dan Thailand.



Mohd Salleh bersama Dr Mohammad Shatar (kanan) melancarkan penerbitan buku pada Seminar Antarabangsa Linguistik dan Pembudayaan Bahasa Melayu Kesembilan di UPM, semalam.

[FOTO MOHD KHAIRUL HELMY MOHD DIN/BH]